

02/06/2000

`Sambutan bagaikan mimpi indah'

ALOR STAR, Khamis - Bagi Aishah Nawawi, generasi ketujuh keturunan Mahsuri, layanan kelas pertama yang diterimanya di negeri ini sejak 30 Mei lalu, bagaikan satu mimpi indah.

Aishah, 14, berkata beliau tidak menyangka sejak berada di negeri ini tiga hari lalu, banyak pengalaman terlalu indah yang baginya hanya berlaku sekali seumur hidup.

"Bayangkan semalam saya berkesempatan berjumpa Perdana Menteri (Datuk Seri Dr Mahathir Mohamad) dan pagi ini pula berada dalam istana menghadap Sultan dan Sultanah Kedah serta kerabat diraja," katanya kepada pemberita menerusi jurubahasa di sini, hari ini.

Aishah dan keluarganya meluangkan masa kira-kira sejam mulai jam 10 pagi minum dan berbual dengan keluarga diraja. Kedua-dua keluarga kemudian bergambar kenang-kenangan.

Anak kepada pemandu `tut-tut', kenderaan pengangkutan awam ala teksi di Thailand itu, kelihatan jelita dengan berpakaian songket Melayu berwarna ungu. Sepanjang berada di istana, beliau tidak lekang menguntumkan senyuman.

Bagaimanapun, Aishah kelihatan kekok apabila pelayan istana bercangkung untuk meletakkan kuih ke dalam piringnya dan kemudian bertanya sama ada beliau ingin menambah kuih.

Ketika ditemui di luar istana, Aishah berkata beliau terlalu gembira dengan sambutan luar biasa yang diterima sepanjang berada di negeri ini.

"Saya masih belum percaya dengan apa yang sedang dilalui ini. Sebelum ini, banyak pihak yang menyatakan minat ingin membawa saya ke negeri ini tetapi ia kemudian diam begitu saja.

"Saya dimaklumkan yang saya adalah waris Mahsuri, sebuah lagenda di Langkawi, apabila sudah remaja. Sebelum ini saya tidak tahu sama ada untuk berasa bangga atau tidak tetapi apabila berada di sini kali ini, lagenda moyang saya nyata begitu hebat," katanya.

Apabila ditanya sama ada beliau berminat menerima pelawaan Kerajaan Malaysia untuk menetap di Langkawi, Aishah berkata:

"Saya perlukan masa untuk memikirkan pelawaan itu secara mendalam. Saya perlu pulang semula ke Phuket dan kemudian akan membuat keputusan di sana."

Semalam, Menteri Kebudayaan, Kesenian dan Pelancongan, Datuk Abdul Kadir Sheikh Fadzir berkata kerajaan akan menyediakan kemudahan sewajarnya kepada Aishah supaya menetap di Langkawi kerana nenek moyang mereka berasal dari pulau itu.

(END)